

Relacionnan sexual entre menornan di edad y mayornan di edad ta aumentando na Aruba

Ta parse cu esaki ta style

INSPECTOR Eric Lake ta duna di conoce cu awendia tin e sindrome di sugar daddy y sugar mommy. Segun e hefe di jeugd en zeden politie, tin hende mayor di edad cu ta pensa cu muchanan menor di edad ta facil, ta dunanan tur sorto di regalo, ta treatnan, ta core cu nan den auto, ta cumpra celular pa nan, etc y esaki ta conduci cu e muchanan ta bai tin relacion cu hendenan mas bieu cu nan.

Segun Lake, awendia e personanan aki no ta wordo yama sugar daddy of sugar mommy mas, nan ta wordo yama amigo di beneficio, pasobra tin placa

su tras. Inclusive e ta bisa cu nan tin meldingnan caminda mayornan ta manda nan yiunan busca amigo di beneficio pasobra cos no ta bon na cas.

Tin muchanan tambe cu ta hasta bisa cu nan no tin un guy di nan edad pasobra no ta combinan na ya cu e no tin cen y no por haci nada pa nan. Esaki mayoria di biaha ta mucha muher.

E mucha hombernan hopi biaha, ora nan ta meti cu un persona di nan mesun sexo masha rara bes lo tende cu nan ta yega jeugd en zeden politie y duna un denuncia di esey. Segun inspector Lake.

E kehonan ta wordo haci pa e mayornan y no dor di e muchanan mes.

Ora cu jeugd en zeden politie atende cu un caso nan ta keda vigile despues tambe, y hasta ta comenta cu tin casonan caminda e mucha muher ta bisa cu polis por wel di sera e cabayero, pero asina e sali el lo bai bek serca dje. Den e caso aki polis ta avisa e mayornan pa wak si nan por busca ayudo den ambiente social, manera un psicologo, un trahador social, pasobra jeugd en zeden politie no ta un instancia social sino hudicial.

Inspector Eric Lake a remarca

tambe cu den ley ta prescribi cu esnan cu tin relacion sexual cu menornan di edad entre 12 y 16 aña ta castigabel, independiente si e menor a aproba e relacion. Pesey e ta bisa cu esun cu ta pensa cu e mucha mes a dune permiso of e mucha mes a pidi'e pa tin relacion cune ta completamente fout. Si mayornan haya sa y ta entrega keho, inmediatamente ta cuminsa cu e caso.

E tipo di casonan aki, esta di relacion entre menor di edad y mayor di edad ta aumentando na Aruba. Na 2004 tabatin 4 caso; na 2005 tabatin 6; na 2006 tabatin 9 y na 2007 a yega te 12. Igualmente inspector Lake ta comenta cu tanten cu nan no haya denuncia nan no por bisa cu e caso a pasa, pero e ta pasa mas biaha y esey ta sigur. Segun e ta bisa, ora e mucha muhernan duna declaracion na jeugd en zeden politie, nan ta bisa cu nan amiganan na scol tambe tin relacion cu hendenan mas beu cu nan, pero kizas e mayornan no sa y e mucha no ta bai bisa cual ta e amiganan.

Pa preveni esaki tin diferente instancia ta duna charla na diferente scol, incluyendo jeugd en zeden politie, pero inspector Eric Lake ta kere cu mester di mas, mester splica hubentud di Aruba cu esaki no ta e mihor cos pa haci. "Cu un hende bira activi sexualmente promer cu e bira mayor di edad, bo por compronde esey, pero bo tin di splicanan si cu no ta e momento adecuado pa bo cuminsa tin relacion sexual y tin yiu promer cu bo tin un diploma, cu bo ta un hende cu por dicidi riba su mes". E ta agrega cu awendia e cos aki ta parse di ta style y ta tene e cosnan aki hopi escondi ya cu si e bin afor, e ora e sponsorship ta caba.

A pesar cu e casonan di sugar mommies no ta bin dilanti hopi, toch segun inspector Lake, nan ta pasa, pasobra tin denunciacionan di mayornan cu ta duna keho cu nan yiu muher tin relacion cu un persona di su mesun sexo hopi mas bieu cu nan, pero tambe mucha hombernan cu tin relacion cu hende muhernan mayor di edad.